

## WUDRJEŇCA

- a) wulka hara, rjejeńca
- b) wulka „wudrěta“ škałoba w skalinjce
- c) horni džěl kurjenca, wosebje za honače wažny

Prawa je wotmołwa **b**.

*Wudrjeńca je škałoba w skalinjce, takrjec wuski doł mjez nahłymi skaliznami. Často pluskota abo šumi deleka rěka po kamjenjach.*

### Takle móžeš to tež prajíc

kótlina, wužłobina, wudolina

### Připódla prajene

Wudrjeńca přiidže wot werba wudrěć/ wudrěwać. Zwjetša je rěka škałobu do zemje wudrěła. Jara nazorny přikład za wudrjeńcu je Grand Canyon w Sewjerneje Americe.

### Přikłady z rěčneho korpusa

Młody hejtman wupósla něšto muži, zo bychu wuslědzili, što so tam pali. Mjelčo přilačichu so tući hač k městnu, hdžež płomjo sapaše. Běše to hłuboka *wudrjeńca*, a srjedža steješe wulka prastara chójna.

(Hronow a druhe powědančka. Zběrka serbskeje prozy 19. lětstotka III. džěl, Budyšin 1967)

Hišće přez čerwjenu skalnu *wudrjeńcu*, potom móžemy po šerokim mosće přez rěku Naryn jěć.

(Achim Mič, Njebjesam blisko. Z džěnika serbskeho alpinista. Do hornjoserbsčiny přeložil Alfred Měškank, Budyšin 2008)

Lěžu přez někotre płoty a murje, puščam so přez hłuboke *wudrjeńcy* wuprahnyjenych rěčkow a hrjebjow a měřju so na wulke, wosobne běže twarjenje, kotrež mam za šulu. (Měrcin Nowak-Njehorński, Mjez Wardarom a Jadranom. Pućowanske wobrazki z Juhosłowjanskeje, Budyšin 1970)